



中國藝術文獻叢刊

黎簡集

下

〔清〕黎簡

浙江出版聯合集團
浙江人民美術出版社



中國藝術文獻叢刊

黎

簡

集

下

〔清〕黎簡 著

閔興潘

葉子卿

整理

浙江出版聯合集團
浙江人民美術出版社

五百四峰堂詩鈔卷十九

己酉年

元 日

幾年作客過元日，有夢隨春入故園。判斷鄉愁會鄰里，寵光花事縱晴暄。詩工世許危言得，身賤人知獨行尊。親老兒歸況殘歲，倍常安飽弄諸孫。

人日絕句二首

竹筍過牆靜不禁，桃花隔苑熱生憎。幾年去汝歸還見，不見梅窗明佛燈。昔年人日禮藥師，七級佛燈燃百枝。藥煙閣上逢人日，不似香清人病時。

與邱少尹約開歲三四日當來廣州今踰三日矣戲作絕句二首

亞枝梅颭暖波香，日色山容澹沲光。
十里花鶯湖一曲，酒船須與老知章。
邱君，
四明人。

桃李着花纔數枝，客程太早春太遲。
一分春色四年別，梅花乞人三日期。

贈宗芥颿

江潮春滿花照潭，水風花雲香撲帆。
波光皺空漾白袷，一箇鷺鷥明暖藍。
入城收鉢洗赤足，呼兒開篋穿青衫。
還家半月花下睡，振袖花霧霏滄滄。
隔歲題詩憶宗炳，急欲對榻窮幽探。
樵夫昨持五丁斧，割取一股浮山嵐。
春風吹人靜煦盎，虛壁叫狔深甜飴。
綠崖丹梯興突凹，鬱爲迴句爲雄談。
君兼令弟才軾轍，瑯琊大璞遺鐫鐫。
銀灣上游弄明月，天鏡一洗萬古函。
餘波珠璣且千斛，我則測海量甌甌。
昔年金篋未刮目，不識載寶填我貪。
愚公今猶愚不已，以力角命驅重巖。
太行王屋本何物，乃

欲一擔東南擔。君能照日見肺腑，病有根柢難鋤芟。且云堅白戰好惡，如就飲食殊酸鹹。煙雲橐籥一氣出，或白似絮元如黠。黔鵠浴烏豈本色，強以粉墨顧兩慚。疾無可換笑扁鵲，心已自醉緣季咸。要知真氣浩莫撓，或爲風積或海涵。五車多方倘非我，空爾黃馬驪牛三。感君饋藥再拜受，八石九轉區仙凡。始知有病佛所憫，我維摩詰君瞿曇。法門不二今自得，不復語言惟默參。詩家人禪此三藐，實地踏脚真二南。是時春空皎秋色，人影墮地瘦巉巖。三城月高萬家夢，世界至靜夜氣酣。愛君官舍冷於水，不以家累如僧庵。我亦終歲離眷屬，似禿施髭徒毵毵。六時相過一笑別，不着芥蒂眠春蠶。

古樹歌有序

邱太守鄞江故居有二松一柏，乃宋時故物也。海內巨公士夫多有詩。前年在南澳，書囑予爲作歌。昨日數接讌坐，未有以應之也。今邱君往守廉州，別後爲寫作三樹，係以長句，遠寄焉。先是，爲邱君題奚鐵生畫梅卷作長句，故即以

起興。

昨題奚岡畫梅卷，已似西湖初雪晴。寥天皚皚風漠漠，吹我夢落君前庭。庭前在昔君語我，有宋三樹森相撐。兩松一柏五百歲，至是與我遙通靈。鬱芊故國得喬木，摩挲古先遺典型。何來陌上三老叟，再拜里中諸父兄。冰霜久蝕邱壑骨，崛強怒餘龍虎形。萬均神力撓一寸，已屈未伏勢尚橫。盡令觀者助兀冪，願作壯士迴生瘳。盤空風霆日竄窳，積雨落蘚春迷冥。雲陰近已接廿里，二十里，雲邱君居處。黛碧遠疑連四明。先生昔戴華陽冠，三層高閣翻道經。嗒爾隱几得天籟，泠然小和平聲吹玉笙。君看細鏤皺疊折，似嚙海岸波痕青。蔽牛一賞漆園吏，歸鶴幾見遼東丁。憶君初來度梅嶠，曲江手蹟奇崢嶸。側帽寒吹白日外，長風驅入滄濤聲。古梅月店天半睡，鄉夢吾廬林下行。十年風雨變鬚髮，不減幽興隨官程。官能詩句秀蓊蔚，得勿此樹苞元精。前年伯牙在海上，天水浩浩琴獨鳴。裁書索我詠嘉木，又諒荒歲無詩情。三年別日世路闊，萬物復命吾詩成。詩成寄君向合浦，更寫三樹爲翠屏。屏以充君歲寒操，詩爲太守留清名。他時歸橐愧陸賈，但可不愧還珠亭。

二月五日作

計日晴過百，聞雷忽異常。
江波橫捲地，城壁甚垂堂。
病鬱中俱解，雲寒低更長。
老親藤杖在，扶雨看新秧。

始聞雷寄友

小樓春過日，異地夜聞雷。
花節蕭條雨，鄉愁激灩杯。
離居將夢補，天運與人回。
勸且推茲理，暄陽到濕灰。

細雨

江雲壓城上，城影入春陰。
陰重寒霏雨，風迴軟濕襟。
社遲容閉蟄，花午褪歸禽。
濁酒西堂晚，明當碧水深。

六 載

六載桐篁三尺墳，不因寒食始憐君。
春如昨夢天多雨，別到今年地有雲。
燃紙蝶灰風栩栩，遺衣蟬蛻霧熏熏。
剗心禿管看成塚，墮淚碑成未勒文。

己酉四月絕句三首

龍眼花時蜂滿村，溪流濃綠澀堤痕。
花光晚晚雲狼藉，故作驕晴故晝昏。
龍眼花落水渾綠，無雨致苦不可飲。

廟瓦璁璫碧艸煙，西淋山翠漾江天。
天光淨綠飛晴雪，剩見清明幾陌錢。
壇覆雲根老柏庭，社公袍笏蘚紋青。
一從社後無風雨，可乞身邊社母靈。
粵社祀以卵石。俗以社日前雨爲社公雨，以後爲社母雨。

重題雨仙壇在斗姥壇側。

天姥壇高日月迴，壇邊云此集風雷。
巖寒朽樹無生氣，雲斷香爐賸死灰。
到日

適當丁未劫，懷歸宜築望思臺。廣州故是仙人窟，自牧牛羊可往來。雨仙，牧牛童子云。

四日詩寄謝薑臣

昨日珠娘擢越舲，橫波南岸望津亭。雲邊樓閣樓邊樹，獨見將軍柳樹青。

今日江雲滄滄生，風情蘊藉雨聲清。南村老將掀髯笑，北看風吹雨入城。

往日兼君汗漫遊，春江花月作去聲詩鈎。今來見爾如開鏡，一樣年華兩白頭。

他日人間擅畫名，倪迂邱壑懶經營。鐵鈎鎖子金剛杵，輸爾梅翁筆勢橫。謝二近

工墨竹。

喜雨詩與諸友

昨日同讌遊，我以病獨回。空雲壓扁舟，相逐過海來。百里蘆葦聲，黑潭屯殷雷。已復見西日，灼赭東垣苔。人夜自臥病，瓦響生疑猜。聽微若駐遠，去驟如一摧。虛堂冷蕩漾，著處先病骸。遙知諸君興，艤舟楊柳涯。燭光亂波影，璀璨金銀

堆。離合阻半晷，喧寂同懽懷。朝來竟日雨，簷瀑懸崩崖。轉憂滄溟捲，未防西北頽。樵夫急歸夢，看種雲沙隈。人間雖四月，萬物始發荄。迢遞山水間，初似春登臺。迴首歌尊前，酒極歌喉哀。

戲寄謝蓋臣

日日雨來南入城，城中不見熱塵生。心知物態安無躁，眼接山光遠益明。水底碧天深鳥影，柳邊白袷試蟬聲。新詩改罷誰閑着，晚飯新涼寄老兵。

漫題

昨日還家耳目清，不關睇聽屬花鶯。紡車妻似故人爪，織布女同賢母聲。稍謝號寒及僮僕，優能治病費瓢鐙。更須農具教兒輩，量買僻田租稅輕。

初夏野矚與謝蓋臣

山田新綠水田黃，高有涼雲下日光。
忽地陰晴走中野，一團風雨攪斜陽。
詩人南極心情闊，老吏西津日月長。
回首十年誰好在，兩番門外好垂楊。

春酒

樵夫終歲無齋禁，飲者皆云我自然。
四十恒河還故國，九旬慈父喜新年。
鶯啼柳蹕雙甘地，燕啄花熏五戊天。
此事少闌農事急，荷鋤歸看暮炊煙。

波

柳外離愁壓飽颿，鳳凰岡下白鵝潭。
低斜雨脚青楓浦，搖漾雲絲白袷衫。
我欲蓮湖安屋裏，人惟桃葉稱江南。
最憐花落空邨月，遶枕溪聲睡不堪。

五月一日庭前桂花

去歲人今日，客花驚客心。今朝坐香樹，嘉節動嘉吟。正席沾茵拜，稱觴糝酒斟。老人宜小苑，晨砌轉去聲清陰。在昔藥煙閣，於時荷葉襟。香都來捲袂，細不礙彈琴。午月攢星玉，微陽結粟金。枝長別日遠，影重夢雲深。喜有團芳蜜，聊無弔夜禽。永懷偷藥去，蟾窟闌沉沉。

雞鳴出步作

蛤吠水田殘月明，閤中涼白靜中聲。門開花落人早出，燈轉鳥飛雞亦鳴。詩在故鄉聞好語，學於中歲切深畊。海東兀兀雲千丈，更與東風曉雨成。

玉溪詠柳八韻

映江無限柳，柳外映斜曛。晚晚春迷目，煙中又水濱。遠途從此別，南浦送夫

君。浪足船偎岸，風情露漬裙。樓高尖稍出，帆暮入難分。寒重如能雨，青多爲借雲。山容相視笑，天色帶愁醺。莫自驕才思，題詩觸緒紛。

郊外

五月盛野色，綠蕪邅氣涼。渡河山亂翠，映日雨懸光。游倦詩才約，年豐物澤昌。雲沙此郊外，空闊度吾堂。

江聲

五月夜潮生，江聲挾雨聲。有餘風浪勢，還殿菰葭鳴。地轉沙移岸，天空月蕩城。寧知孤艇客，安寢夢生平。

移

居 新買鄰屋，五月十五日移居。

取容師子座，聊得鵲巢居。地近竹來筍，堂涼蟲避書。雞裁鳴子舍，燕且傳蘧

廬。擬築三層閣，吹笙近太虛。

積水

積水夜逾高，虛空壁挂刀。地深青見底，星冷碧無毛。禪納三天大，形難一物逃。吾心萬丈月，不亂任風濤。
昌谷詩：「壁冷挂吳刀。」

白花海榴十韻

故人花作骨，舊種玉爲房。地僻容三尺，根深有十霜。昔時聊散病，此夜未曾央。身畔碧沈重，月梢明對當。少看驚態異，多簇照肌涼。枝軟疑天棘，叢高勝佛桑。圓垂苦李小，寒劈碎冰方。眼淨且忘鼻，色空寧著香。惱公傷別遠，如妾可憐長。感物思留子，移栽入內堂。

驟雨篇

炎天石尤起西北，忽到東南波面黑。西樵破碎下九江，片片飛濤有山色。江皋

亭子立骨格，編茅吹起軒兩翼。有似黃鵠負大力，忽然斷散收不得。插沙飲海萬矢直，要與雨勢爭相射。萬家村瓦一霹靂，雨點星明重如石。仰視嵯峨大鐵圍，太山急作鴻毛擲。我從靜中視吹息，帽簷載風身倒側。寥天一角蛟龍氣，斷虹千丈元黃跡。滄江返照扶桑枝，爛銀堆裏三山碧。

就樹堂寄郭山人

愛爾就樹堂，瓦脊俯山木。終年花繞牀，每夜葉打屋。紙窗明短檠，梧雨奏哀玉。古甕春陸離，新花露芬馥。畫成碧山曉，海日照簷竹。

叢蘆

黯偃叢蘆十里長，春山無影水無光。夜漫露重疑花白，睡忘風多但雨涼。昨日青簑理煙艇，故人赤牘下江鄉。去迷住著歸何定，報與纔春百里糧。

種竹十四韻 分藥煙閣外小竹。

一角新居地，三竿小閣孫。未分異氣土，曾過別家園。
增得當心日，無傷放手根。煙啼上番淚，影削故人魂。
晝正泥俱暖，秋前葉可繁。熱宜汗下種，涼待酒醒喧。
預想花迷路，寒潮夜入邨。於時舟繫岸，圓月碎侵門。
水碧交天色，霜濃冰石痕。晚雲垂地重，夕火隔林昏。
夢去風猶住，詩艱袖欲溫。物遲高興後，事舉夙心存。
屈指人何識，扳枝泣自吞。十年仍五月，永別託長言。

村晚

風雨入空邨，江天空閉門。花浮別夢去，燈付怨蟲昏。
前路惟華髮，歸時憶故禪。長鄉何事好，多病道彌尊。